



Comhairle an  
Aontais Eorpaigh

An Bhruiséil, 7 Samhain 2023  
(OR. en)

---

---

Comhad Idirinstiúideach:  
2023/0233 (NLE)

---

---

14010/23  
ADD 1

COEST 549  
POLCOM 231

### **GNÍOMHARTHA REACTACHA AGUS IONSTRAIMÍ EILE**

---

Ábhar: DRÉACHTCHINNEADH ÓN gCOISTE COMHLACHAIS AE-AN ÚCRÁIN I gCUMRAÍOCHT TRÁDÁLA maidir leis an measúnú dearfach ar chur chun feidhme chéim 1 mar a leagtar amach in Iarscríbhinn XXI-A a ghabhann le Caibidil 8 den Chomhaontú Comhlachais idir an tAontas Eorpach agus an Comhphobal Eorpach do Fhuinneamh Adamhach agus a mBallstáit, de pháirt amháin, agus an Úcráin, den pháirt eile

---

# AUGISÍN I

DRÉACHT

**CINNEADH UIMH.../2023**

## **ÓN gCOISTE COMHLACHAIS AE-AN ÚCRÁIN I gCUMRAÍOCHT TRÁDÁLA**

an ...

**maidir leis an measúnú dearfach ar chur chun feidhme chéim 1  
mar a leagtar amach in Iarscríbhinn XXI-A a ghabhann le Caibidil 8 den  
Chomhaontú Comhlachais idir an tAontas Eorpach  
agus an Comhphobal Eorpach do Fhuinneamh Adamhach agus a mBallstáit,  
de pháirt amháin, agus an Úcráin, den pháirt eile**

TÁ AN COISTE COMHLACHAIS I gCUMRAÍOCHT TRÁDÁLA,

Ag féachaint don Chomhaontú Comhlachais idir an tAontas Eorpach agus an Comhphobal Eorpach do Fhuinneamh Adamhach agus a mBallstáit, de pháirt amháin, agus an Úcráin, den pháirt eile<sup>1</sup>, agus go háirithe Airteagal 153 de,

---

<sup>1</sup> IO AE L 161, 29.5.2014, lch. 3.

De bharr an mhéid seo a leanas:

- (1) An Comhaontú Comhlachais idir an tAontas Eorpach agus an Comhphobal Eorpach do Fhuinneamh Adamhach agus a mBallstáit, de pháirt amháin, agus an Úcráin, den pháirt eile ('an Comhaontú'), síníodh é an 27 Meitheamh 2014 agus tháinig sé i bhfeidhm an 1 Meán Fómhair 2017.
- (2) Aithnítear sa Bhrollach a ghabhann leis an gComhaontú tiomantas na hÚcráine a reachtaíocht a chomhfhogasú de réir a chéile do reachtaíocht an Aontais, de réir mar a leagtar amach sa Chomhaontú, agus í a chur chun feidhme go héifeachtach, agus ar an gcaoi sin rannchuidiú le comhtháthú eacnamaíoch de réir a chéile agus le comhlachas polaitiúil na hÚcráine leis an Aontas a dhoimhniú.
- (3) I gcomhréir le hAirteagal 154 den Chomhaontú, comhaontaíonn na Páirtithe gur de réir a chéile agus go comhuaineach a bhainfear amach oscailt éifeachtach chómhalartach a margáí féin i réimse an tsoláthair phoiblí faoi seach.
- (4) De bhun Airteagal 153(1) agus (2) den Chomhaontú, tá an Úcráin le háirithiú go mbeidh a reachtaíocht reatha agus an reachtaíocht a bheidh aici amach anseo maidir le soláthar poiblí i gcomhréir, de réir a chéile, le *acquis* soláthair phoiblí an Aontais. Tá an comhfhogasú reachtach sin le déanamh i gcéimeanna leantacha mar a leagtar amach sa sceideal in Iarscríbhinn XXI-A (Sceideal Ama Táscach maidir le hAthchóiriú Institiúideach, Comhfhogasú Reachtach agus Rochtain ar an Margadh) a ghabhann le Caibidil 8 den Chomhaontú ('Iarscríbhinn XXI-A').

- (5) I gcomhréir le hAirteagal 153(2) den Chomhaontú, tá an Coiste Comhlachais i gcumraíocht Trádála le meastóireacht a dhéanamh ar chur chun feidhme gach céime a leagtar amach in Iarscríbhinn XXI-A . D'fhéadfadh measúnú dearfach ar chur chun feidhme céime a bheith mar thoradh ar an meastóireacht sin trí bhíthin Cinneadh ón gCoiste.
- (6) Le hIarscríbhinn XXI-A, leagtar síos na ceanglais atá le comhlíonadh ag an Úcráin maidir le céim 1 a chur chun feidhme.
- (7) Tar éis chogadh foghach na Rúise i gcoinne na hÚcráine, ar bhonn an dlí airm atá i bhfeidhm san Úcráin agus ar feadh ré an dlí sin, tá eisceachtaí sealadacha tugtha isteach ag an Úcráin óna reachtaíocht soláthair phoiblí trí bhíthin Rún. Tá an measúnú ar chur chun feidhme chéim 1 mar a leagtar amach in Iarscríbhinn XXI-A bunaithe ar thiomantas na hÚcráine na heisceachtaí sealadacha ón reachtaíocht soláthair phoiblí a tharraingt siar laistigh de 90 lá ó dháta foirceanta nó cealaithe chóras dlíthiúil an dlí airm san Úcráin,

TAR ÉIS AN CINNEADH SEO A GHLACADH:

### *Airteagal 1*

Tugtar measúnú dearfach maidir le cur chun feidhme chéim 1 ag an Úcráin mar a leagtar amach in Iarscríbhinn XXI-A, bunaithe ar na cúiseanna a thugtar san Iarscríbhinn a ghabhann leis an gCinneadh seo.

### *Airteagal 2*

Glacadh an Cinneadh seo sa Bhéarla, sa Bhulgáiris, sa Chróitis, sa Danmhairgis, san Eastóinis, san Fhionlainnis, sa Fhraincis, sa Ghaeilge, sa Ghearmáinis, sa Ghréigis, san Iodáilis, sa Laitvis, sa Liotuáinis, sa Mháltais, san Ollainnis, sa Pholainnis, sa Phortaingéilis, sa Rómáinis, sa tSeicis, sa tSlóivéinis, sa tSlóvaicis, sa Spáinnis, sa tSualainnis, san Úcráinis agus san Ungáiris, agus comhúdarás ag gach ceann de na teangacha sin.

### *Airteagal 3*

Tiocfaidh an Cinneadh seo i bhfeidhm ar dháta a ghlactha.

Arna dhéanamh in/sa ...

*Thar ceann an Choiste Comhlachais i gcumraíocht na Trádála*  
*An Cathaoirleach*

*Na rúnaithe*  
*Thar ceann na hÚcráine*

...

*Thar ceann an Aontas Eorpaigh*

...

## IARSCRÍBHINN

I gcomhréir le hIarscríbhinn XXI-A tá na ceanglais seo a leanas le comhlíonadh chun céim 1 a chur chun feidhme:

- (1) Cur chun feidhme na bhforálacha seo a leanas den Chomhaontú:
  - (a) Airteagal 150(2);
  - (b) Airteagal 151; agus
- (2) An Straitéis Athchóirithe a leagtar amach in Airteagal 152 den Chomhaontú a chomhaontú.

### **Ceanglas 1(a):**

Maidir le ceanglas (1)(a), foráiltear le hAirteagal 150(2) den Chomhaontú: ‘Faoi chuimsiú an athchóirithe institiúidigh, déanfaidh an Úcráin an méid seo a leanas a ainmniú go háirithe:

- (a) comhlacht feidhmiúcháin lárnach atá freagrach as beartas eacnamaíoch agus a bhfuil sé de chúraim air beartas comhleanúnach a ráthú i ngach réimse a bhaineann le soláthar poiblí. Déanfaidh comhlacht den sórt sin cur chun feidhme na Caibidle seo a éascú agus a chomhordú, agus treoróidh sé an próiseas um chomhfhogasú reachtach.

- (b) comhlacht neamhchlaonta neamhspleách a mbeidh sé de chúram air athbhreithniú a dhéanamh ar chinntí arna ndéanamh ag údaráis chonarhacha nó ag eintitis chonarhacha le linn conarthaí a dhámhachtain. Sa chomhthéacs sin, ciallaíonn ‘neamhspleách’ go mbeidh an comhlacht sin ina údarás poiblí ar leithligh ó gach eintiteas conarthach agus gach oibreoir eacnamaíoch. Beifear in ann na cinntí a dhéanfaidh an comhlacht sin a chur faoi réir athbhreithniú breithiúnach.’

Comhlíontar an ceanglas faoi Airteagal 150(2)(a) den Chomhaontú le Dlí Uimh. 114-IX na hÚcráine ‘Maidir le Leasuithe ar Dhlí na hÚcráine “Maidir le soláthar poiblí” agus le gníomhartha reachtacha áirithe eile de chuid na hÚcráine maidir le feabhas a chur ar sholáthar poiblí’ (‘Dlí Soláthair Phoiblí’) a ghlac Parlaimint na hÚcráine an 19 Meán Fómhair 2019, agus lena modhnaítear Dlí Uimh. 922-VIII na hÚcráine an 25 Nollaig 2015 ‘Maidir le Soláthar Poiblí’.

Is é an ‘Comhlacht Údaraithe’ an comhlacht feidhmiúcháin lárnach a bhfuil sé de chúram air beartas comhleanúnach agus a chur chun feidhme a ráthú i ngach réimse a bhaineann le soláthar poiblí.

Sainítear in Airteagal 7 den Dlí Soláthair Phoiblí an Comhlacht Údaraithe a bheidh freagrach as an mbeartas soláthair stáit a rialáil agus a chur chun feidhme laistigh de raon feidhme a chumhachtaí arna mbunú leis an Dlí Soláthair Phoiblí.

Leagtar amach in Airteagal 9 den Dlí Soláthair Phoiblí príomhfheidhmeanna an Chomhlachta Údaraithe, mar seo a leanas:

- (1) forbairt agus formheas na rialachán is gá chun an Dlí Soláthair Phoiblí a chur chun feidhme agus chun beartas stáit a rialáil i réimse an tsoláthair phoiblí;
- (2) anailís ar fheidhmiú an chórais soláthair phoiblí;
- (3) an tuarascáil bhliantúil a ullmhú agus a thíolacadh, tráth nach déanaí ná an 1 Aibreán den bhliain i ndiaidh na bliana airgeadais tuairiscithe, chuig Verkhovna Rada na hÚcráine, chuig Comh-Aireacht Airí na hÚcráine agus chuig Seomra Cuntasaíochta, tuarascáil ina bhfuil anailís ar fheidhmiú an chórais soláthair phoiblí (maidir le táscairí cainníochtúla agus luacha i dtéarmaí nósanna imeachta soláthair agus ítimí soláthair, leibhéal iomaíochta, líon na ngearán) agus an fhaisnéis ghinearálaithe faoi thorthaí rialaithe i réimse an tsoláthair phoiblí. Foilsítear an tuarascáil bhliantúil ar leathanach gréasáin oifigiúil an Chomhlachta Údaraithe;
- (4) achoimre a dhéanamh ar chleachtais soláthair, lena n-áirítear cleachtais idirnáisiúnta;
- (5) staidéar agus achomair a dhéanamh ar na dea-chleachtais soláthair idirnáisiúnta, agus iad a scaipeadh;
- (6) feidhmiú Thairseach Gréasáin an Chomhlachta Údaraithe agus Acmhainn Faisnéise an Chomhlachta Údaraithe a áirithiú;

- (7) ábhar Acmhainn Faisnéise an Chomhlachta Údaraithe a bhainistiú;
- (8) cumarsáid leis an bpobal maidir leis an gcóras soláthair poiblí a fheabhsú;
- (9) cruinnithe agus ceardlanna atá tiomnaithe do chúrsaí soláthair a eagrú;
- (10) comhar idirnáisiúnta i réimse an tsoláthair;
- (11) forbairt agus formheas na ndoiciméad seo a leanas:
  - doiciméid tairisceana shamplacha;
  - rialúcháin shamplacha maidir le duine údaraithe;
  - rialúcháin shamplacha maidir leis an gcoiste tairisceana
  - modheolaíocht shamplach chun luach measta ítime soláthair a chinneadh;
  - modheolaíocht shamplach chun an costas saolré a chinneadh;
  - an nós imeachta maidir leis an ítim sholáthair a shainathint;
  - an nós imeachta maidir le faisnéis faoin soláthar poiblí a fhoilsiú;

- an nós imeachta maidir le creat-chomhaontuithe a thabhairt i gcrích agus a chur chun feidhme;
  - foirm agus ceanglais maidir le slándáil tairisceana;
  - an nós imeachta maidir le tástáil daoine údaraithe a eagrú;
  - liosta na n-earráidí foirmiúla;
- (12) moltaí ginearálta a sholáthar maidir le cur i bhfeidhm na reachtaíochta soláthair phoiblí;
- (13) comhairle, nach mbeidh inti ach moladh, a chur ar fáil saor in aisce trí Acmhainn Faisnéise an Chomhlachta Údaraithe;
- (14) comhar le heintitis phoiblí agus le heagraíochtaí na sochaí sibhialta maidir le cleachtais éillitheacha a chosc i réimse an tsoláthair;
- (15) an beartas agus na rialacha soláthair phoiblí a chur in iúl don phobal;
- (16) údarú ríomh-ardán a údarú agus a chur ar ceal;
- (17) breithniú a dhéanamh ar iarrataí chun eagraíochtaí láraithe soláthair a ainmniú agus/nó a bhunú;

- (18) treoirlínte a fhorbairt i gcomhar le húdaráis eile maidir le sainghnéithe soláthair in earnálacha éagsúla agus foilsíú na dtreoirlínte sin ag Acmhainn Faisnéise an Chomhlachta Údaraithe.

Is í Aireacht Geilleagair na hÚcráine, go háirithe ag an Roinn Beartais um Sholáthar Poiblí agus Iomaíocht, a fheidhmíonn ról an Chomhlachta Údaraithe. Leagtar struchtúr, freagrachtaí agus cúraimí mionsonraithe na Roinne Beartais um Sholáthar Poiblí agus Iomaíocht amach sna Rialacháin maidir leis an Roinn Beartais um Sholáthar Poiblí agus Iomaíocht.

Maidir leis an gceanglas faoi Airteagal 150(2)(b) den Chomhaontú, i gcomhréir leis an leasú ar an dlí speisialta ‘Maidir le Coiste Frith-Mhonaplachta na hÚcráine’ (‘AMCU’ agus ‘dlí AMCU’) Uimh. 1219-IX an 5 Feabhra 2021, mar is é an tÚdarás um Athbhreithniú ar Ghearáin é, cuirfidh AMCU Coimisiún (Coimisiúin) (‘an Coimisiún’) um Athbhreithniú ar Ghearáin maidir le Sárúithe ar an Reachtaíocht Soláthair Phoiblí ar bun agus feidhmeoidh sé cumhachtaí eile a leagtar amach sa Dlí Soláthair Phoiblí, i nDlí na hÚcráine Uimh. 2210-III an 11 Eanáir 2001 ‘Maidir le Cosaint Iomaíochta Eacnamaíoch’ mar a athbhreithníodh é, agus i ndlí AMCU.

Is comhlacht stáit é AMCU a bhfuil stádas speisialta aige. Is údarás neamhspleách é AMCU atá faoi rialú ag Uachtarán na hÚcráine agus atá freagrach do Verkhovna Rada na hÚcráine. Áirithítear an neamhspleáchas sin ar an leibhéal reachtach le forálacha ábhartha Dhlí na hÚcráine ‘Maidir le Soláthar Poiblí’ agus le Dlí AMCU.

Ba cheart triúr a bheith i ngach Coimisiún, ar triúr iad atá údaraithe chun athbhreithniú a dhéanamh ar ghearáin maidir le sárúithe ar an reachtaíocht soláthair phoiblí.

An 1 Aibreán 2021, ghlac AMCU an Rialachán ‘Maidir le formheas a dhéanamh ar an Nós Imeachta um roghnú iomaíoch agus ceapadh chuig poist an Choimisinéara um athbhreithniú ar ghearáin maidir le sárúithe ar reachtaíocht soláthair phoiblí’ Uimh. 9-Π, ar dá réir a cheapfaidh Cathaoirleach AMCU na coimisinéirí um ghearáin maidir le sárúithe ar an reachtaíocht soláthair phoiblí (‘an Coimisinéir’). De réir Dhlí AMCU, ceaptar gach Coimisinéir ar feadh téarma seacht mbliana ach gan dul thar dhá théarma as a chéile.

Tá na Coimisinéirí faoi réir na gceanglas agus na srianta a bunaíodh leis an reachtaíocht maidir le héilliú a chosc, agus níl feidhm ag Dlí Uimh. 889-VIII na hÚcráine an 10 Nollaig 2015 ‘Maidir leis an Státseirbhís’ mar a athbhreithníodh é. Ní comhaltaí den Rialtas, den chomhlacht reachtach ná d’Uachtarán na hÚcráine iad na Coimisinéirí agus níl siad faoi cheannas an Rialtais, an chomhlachta reachtaigh ná an Uachtaráin. De réir Airteagal 6-1 de Dhlí AMCU, i gcás an Choimisinéara ar duine é atá gaolmhar leis an duine is ábhar don achomharc nó leis an údarás conarthach, ní fhéadfaidh sé páirt a ghlacadh i mbreithniú agus i gcinnteoireacht an ghearáin sin agus ar feadh thréimhse an bhreithnithe agus na cinnteoireachta maidir leis an ngearán sin, agus cuirfear Coimisinéir eile, arna chinneadh ag Cathaoirleach AMCU, in ionad an Choimisinéara sin, nó féadfar gearán den sórt sin a aistriú chuig Coimisiún eile lena bhreithniú.

Is é Cathaoirleach AMCU a cheapann na Coimisinéirí tar éis dó cigireacht speisialta a chomhlíonadh, cigireacht dá bhforáiltear le Dlí na hÚcráine Uimh. 1700-VII an 14 Deireadh Fómhair 2014 ‘Maidir le hÉilliú a Chosc’, mar a athbhreithníodh é.

Glacfar cinntí ón gCoimisiún thar ceann AMCU agus beidh siad ceangailteach.

Féadfar achomharc a dhéanamh ar Chinntí AMCU laistigh de 30 lá ó dháta a bhfoilsithe ar an gcóras ríomhsholáthair.

I gcomhréir le Forálacha Críochnaitheacha agus Idirthréimhseacha an Dlí lena leasaítear an Dlí maidir le Soláthar Poiblí agus le dlíthe eile de chuid na hÚcráine maidir le feabhas a chur ar an gcóras feidhmiúcháin agus achomhairc maidir le soláthar poiblí Uimh. 1530-IX an 3 Meitheamh 2021, ba cheart feidhm a bheith ag forálacha nua maidir le feidhmiú chumhachtaí AMCU sa réimse um athbhreithniú a dhéanamh ar ghearáin maidir le sáruithe ar an reachtaíocht soláthair poiblí agus maidir le hoibriú an Choimisiúin (na gCoimisiún) an lá a fhoirmítear í (iad).

Mar gheall ar thús chogadh foghach na Rúise i gcoinne na hÚcráine an 24 Feabhra 2022, chuir AMCU stop sealadach le hathbhreithniú a dhéanamh ar ghearáin maidir le sáruithe ar an reachtaíocht soláthair poiblí. Rinneadh an comhlacht achomhairc a athbhunú go hiomlán i mí Aibreáin 2022.

An 13 Feabhra 2023, fógraíodh nós imeachta earcaíochta le haghaidh poist fholmha do na Coimisinéirí le hOrdú ó Chathaoirleach AMCU Uimh. 79-BK, atá ar siúl faoi láthair, i bhfianaise riachtanais an Nós Imeachta maidir le roghnú iomaíoch agus ceapadh chuig poist an Choimisinéara um athbhreithniú a dhéanamh ar ghearáin maidir le sáruithe ar an reachtaíocht soláthair phoiblí.

**Ceanglas (1)(b):**

Maidir le ceanglas (1)(b), agus de réir Airteagal 151 den Chomhaontú, comhlíonfaidh na Páirtithe sraith bunchaighdeán maidir le dámhachtain na gconarthaí go léir faoi mar a ordaítear i míreanna 2 go 15 den Airteagal sin maidir le foilsíú, dámhachtain conarthaí agus cosaint bhreithiúnach. Eascraíonn na bunchaighdeán sin go díreach ó rialacha agus prionsabail an tsoláthair phoiblí, faoi mar rialaítear iad in acquis soláthair phoiblí an Aontais, lena n-áirítear prionsabail an neamh-idirdhealaithe, na córa comhionainne, na trédhearcachta agus na comhréireachta.

De bhun Dhlí Soláthair Phoiblí, déantar nósanna imeachta soláthair phoiblí san Úcráin i gcomhréir leis na prionsabail seo a leanas:

- (1) iomaíocht chóir i measc tairgeoirí;
- (2) an choigilt costais, an éifeachtúlacht agus an chomhréireacht is mó is féidir;
- (3) oscailteacht agus trédhearcacht ag gach céim den phróiseas soláthair;
- (4) neamh-idirdhealú tairgeoirí agus cóir chomhionann leo;

- (5) meastóireacht oibiachtúil neamhchlaonta ar thairiscintí agus dámhachtain oibiachtúil neamhchlaonta;
- (6) cleachtais agus mí-úsáid éillitheach a chosc.

Foráiltear leis an Dlí Soláthair Phoiblí go mbeidh tairgeoirí intíre agus eachtrannacha, gan beann ar a gcineál úinéireachta agus a struchtúr dlíthiúil gnó, rannpháirteach i nósanna imeachta soláthair ar choinníollacha comhionanna.

Leis an leasú ar an Dlí Soláthair Phoiblí trí bhíthin Dlí ‘Maidir le Leasuithe ar Dhlí na hÚcráine “Maidir le Soláthar Poiblí” chun Réamhchoinníollacha a chruthú don Fhorbairt Inbhuanaithe agus don Nuachóiriú ar an Tionscal Intíre’ Uimh. 1977-IX, a glacadh an 16 Nollaig 2021, tugadh isteach ceanglais shealadacha maidir le hábhar intíre i ndáil le hamhábhair, ábhair, cóimeálacha, aonaid, páirteanna, comhpháirteanna agus táirgí, oibreacha, seirbhísí agus nithe eile, ó 2022 ar aghaidh ar feadh tréimhse 10 mbliana. Níl feidhm ag na ceanglais sin maidir le soláthairtí a thagann faoi fhorálacha Dhlí Uimh. 1029-VIII na hÚcráine an 16 Márta 2016 ‘Maidir le hAontachas na hÚcráine leis an gComhaontú maidir le Soláthar Poiblí’, ná leis na forálacha maidir le soláthar poiblí conarthaí idirnáisiúnta eile de chuid na hÚcráine a d’fhormheas Verkhovna Rada na hÚcráine. Dá bhrí sin, níl feidhm ag ceanglais na n-ábhar intíre sin maidir le tairiscintí arna moladh ag oibreoírí eacnamaíocha an Aontais Eorpaigh – bídis bunaithe san Úcráin nó ná bídis – ná maidir le táirgí, seirbhísí nó oibreacha de thionscnamh an Aontais Eorpaigh.

Ón 1 Lúnasa 2016, is tríd an gcóras ríomhsholáthair Prozorro amháin a dhéantar formhór na nósanna imeachta soláthair san Úcráin. Foilsítear an fhaisnéis uile maidir le soláthar poiblí, lena n-áirítear doiciméid tairisceana ina bhfuil ceanglais maidir le hábhar an tsoláthair agus na tairgeoirí, ar an gcóras ríomhsholáthair.

Sainmhínítear ábhair an tsoláthair leis an ‘Stór Focal Comhchoiteann um Sholáthar’ DK 021:2015(‘CPV’), a chuirtear in oiriúint do Stór Focal Comhchoiteann an Aontais Eorpaigh um Sholáthar. Tá CPV ceaptha caighdeánú a dhéanamh ar an tuairisc ar ábhair an tsoláthair poiblí chun trédhearcacht níos fearr agus timpeallacht iomaíoch éifeachtach a áirithiú.

Leagtar amach na teorainneacha ama le haghaidh léirithe spéise agus le haghaidh tairiscintí a chur isteach sa Dlí Soláthair Phoiblí agus bíonn siad éagsúil ag brath ar an nós imeachta soláthair:

- i gcás ina bhfógrófar nós imeachta tairisceana oscailte – 15 lá ar a laghad mura sáraíonn an luach measta na tairseacha agus 30 lá ar a laghad i gcás ina sáraítear na tairseacha a shonraítear thíos;
- i gcás ina bhfógrófar nós imeachta idirphlé iomaíoch – 15 lá ar a laghad mura sáraíonn an luach measta na tairseacha agus 30 lá ar a laghad i gcás ina sáraítear na tairseacha a shonraítear thíos;
- i gcás ina bhfógrófar an nós imeachta tairisceana srianta – tráth nach déanaí ná 30 lá roimh an spriodhata chun doiciméid a chuirtear isteach le haghaidh roghnú cáilíochta.

Is iad na tairseacha thuasluaite EUR 133 000 le haghaidh earraí agus seirbhísí agus EUR 5 150 000 le haghaidh oibreacha. Má sháraíonn luach measta an tsoláthair na tairseacha, ní mór fógra an nós imeachta soláthair a chur ar fáil don phobal freisin ar an ríomhchóras tairisceana i mBéarla.

Éilítear leis an Dlí Soláthair Phoiblí go ndámhfar conarthaí soláthair phoiblí ar bhealach trédhearcach i gcomhréir leis na critéir agus na rialacha a fhógraítear roimh ré. Taispeántar faisnéis faoin tairgeoir ar éirigh leis sa chóras ríomhsholáthair. Féadfaidh tairgeoirí nár éirigh leo a iarraidh ar an údarás conarthach tríd an gcóras ríomhsholáthair faisnéis a sholáthar faoin tairiscint a chuireann an tairgeoir rathúil isteach, lena n-áirítear faisnéis faoina buntáistí i gcomparáid lena thairiscint féin, agus tá sé de cheangal ar an údarás conarthach freagra a thabhairt ar an iarraidh sin laistigh de chúig lá.

Tar éis chogadh foghach na Rúise i gcoinne na hÚcráine, ar bhonn an dlí airm atá i bhfeidhm san Úcráin agus ar feadh a ré, tugadh isteach eisceachtaí sealadacha ón reachtaíocht soláthair phoiblí trí bhíthin rún, lena n-áirítear i ndáil leis na nósanna imeachta soláthair phoiblí, na ceanglais a leagtar síos do thairgeoirí agus soláthar cosanta. Tá an measúnú ar chur chun feidhme chéim 1 mar a leagtar amach in Iarscríbhinn XXI-A bunaithe ar thiomantas na hÚcráine na heisceachtaí sealadacha ón reachtaíocht soláthair phoiblí a tharraingt siar laistigh de 90 lá ó dháta foirceanta nó cealaithe chóras dlíthiúil an dlí airm san Úcráin.

## Ceanglas (2):

I gcomhréir leis an dara ceanglas i gcéim 1 mar a leagtar amach in Iarscríbhinn XXI-A, is gá treochlár faoi mar a leagtar amach in Airteagal 152 den Chomhaontú a fhorghnas.

Foráiltear le hAirteagal 152(1) den Chomhaontú go ndéanfaidh an Úcráin, sula dtosófar ar chomhfhogasú céimnitheach, treochlár cuimsitheach a chur faoi bhráid an Choiste Comhlachais i gcumraíocht Trádála maidir le Caibidil 8 de Theideal IV den Chomhaontú a chur chun feidhme, treochlár ina mbeidh sceidil ama agus garspriocanna. Áireofar sa treochlár sin, treochlár a chomhlíonfaidh na céimeanna agus na sceidil ama a leagtar amach in Iarscríbhinn XXI-A a ghabhann le Caibidil 8, na hathchóirithe uile maidir le comhfhogasú le *acquis* an Aontais agus fothú acmhainneachta institiúidí.

An 24 Feabhra 2016, ghlac Comh-Aireacht Airí na hÚcráine ‘Straitéis athchóirithe an chórais soláthair phoiblí (Treochlár)’ trí rún Uimh. 175-p. Thug an Coiste Comhlachais i gcumraíocht Trádála tuairim fhabhrach uaidh maidir leis an Treochlár cuimsitheach do chur i bhfeidhm Chaibidil 8 trí bhíthin a Chinneadh 1/2018 an 14 Bealtaine 2018.

---